

Tgei damondas ti dalla Baselgia da Diu?

Brev pastorala per la Cureisma 2013
da
msgr. dr. Vitus Huonder
Uestg da Cuera

*Quella brev pastorala ei da preleger en tuts survetschs divins
l'emprema dumengia da Cureisma, ils 17 da fevrer 2013.
Ella sa vegnir publicada ella pressa naven dils 18 da fevrer 2013.*

Cuera, igl 1. da schaner 2013

Frars e soras el Segner,

„Tgei damondas ti dalla Baselgia da Diu?“ Quei vegn dumandau all’entschatta dalla via da preparaziun pil Batten da carschi. La risposta secloma: „La cardientscha“. Quel che battegia damonda vinavon: „Tgei regala la cardientscha a ti?“ Sin quei rispunda il candidat pil batten: „La veta perpetna“.¹ Il sogn Batten ei la porta dalla cardientscha e cheutras era la porta alla veta perpetna.² Il sogn Batten ei en quei senn la porta dalla cardientscha, ch’el arva a nus la via all’entira rihezia dalla cardientscha. Entras il Batten astgein nus ver part dalla veta divina e dils beins dalla cardientscha. Il candidat pil Batten roga per quei dun dalla cardientscha. Entras preparar el pil sogn Batten duei la Baselgia far el habels d’entrar atras la porta dil Batten alla veta perpetna.

¹ Cump. *Ordo Initiationis Christianae Adultorum*, Rituale Romanum, Editio Typica Vaticanum 1972.

² Cump. Papa Benedetg XVI., Scriver apostolic *Porta fidei* dils 11 d’october 2011,1.

La Baselia da Diu

Tier la liturgia dalla preparaziun pil Batten vegn pia plidau dalla *Baselia da Diu* ni semplamein dalla Baselia. Tgei ei la Baselia? Ina cuorta e buna risposta dat a nus la costituziun dogmatica *Lumen gentium* dil Secund Concil Vatican: „ Quels numnadamein che crein en Cristus, ha il (Bab etern) decidiu da reunir ella sontga Baselia“ (2). Aschia ei la Baselia il pievel da Diu che serimna entuorn Cristus (9). Ella ei l'entschatta dil reginavel da Diu cheu sin tiara (5). Ella ei la muntanera sut la protecziun da Diu, igl èr da Diu, la casa da Diu, il niev Jerusalem, la spusa dil tschut senza macla (6). Ella ei il tgierp da Cristus (7) e la famiglia da Diu (32). Quella Baselia ei buca mo ina realitad spirtala, mobein ha tenor la voluntad dil Segner era ina clara e definida fuorma exteriura. Aschia di la medema costituziun: „La Baselia, definida ed ordinada en quest mund sco

societad, ei realisada³ ella Baselgia catolica che vegn menada dil successur da s. Pieder ed en cuminonza cun el dils uestgs“ (8). La Baselgia, clamada en veta da Jesus, ha l’incumbensa d’annunziar la *cardientscha*. Il Segner di gie als endisch giuvnals: „A mi ei dada tutta pussonza en tschiel e sin tiara. Mei pia, e fagei daventar giuvnals tut ils pievels, battegei els enten num dil Bab e dil Fegl e dil Spert sogn, e mussei ad els d’observar tut quei che jeu hai cumandau a vus“ (Mt 28,18-20). Sin quels plaids da Jesus sereferescha la costituziun *Lumen gentium* ed accentuescha: „Quella solemna incarica da Cristus d’annunziar la verdad dil salit ha la Baselgia retschiert dils apostels ed ella sto ademplir ella tochen als cunfins dalla tiara“ (17). Aschia salva la Baselgia atras tut ils temps il bein dalla cardientscha, la verdad dalla cardientscha – ni semplamein la cardientscha – e dat vinavon quel a moda intacta.

³ La noziun autentica latina ei *subsistit in*. Quei munta *subsister* (saver star vinavon). La noziun latina *est* che vegn duvrada ella tradiziun dalla Baselgia (la Baselgia da Cristus ei...) muossa l’identitad, la noziun *subsistit* la continuitad. Ellas ein noziuns che completeschan ina l’altra.

La cardientscha

La noziun *crer* ha per nus cristians differentas nianzas. Jeu less cheu far attents sin quater muntadas. Crer munta en emprema lingia *affirmar l'esistenza da Diu*. Empalaus dalla sauna raschun, sa il carstgaun enconuscher Diu sco scaffider dil mund e signur sur tut igl esser e s'avischinar ad el en respect. „Siu esser nunveseivel, sia pussonza eterna e divinitad sedattan d'enconuscher agl entelleg entras sias ovras e quei dapi la creaziun dil mund“ (Ro 1,20).

Crer munta vinavon, *acceptar la revelaziun divina* e s'empitschar da quella revelaziun divina. Ella hodierna lecziun ord la brev als Romans resumescha sogn Paul ei suandontamein: „Maneivel da tei ei il plaid, en tia bucca ed en tiu cor, quei vul dir: Il plaid dalla cardientscha che nus perdeghein. Pertgei sche ti confessas cun tia bucca che Jesus ei il Signur e creias en tiu cor che Dieus ha leventau el dils morts, vegns ti a

vegnir salvaus“ (Ro,10,8-9). Dieus ei adina puspei serevelaus ed en Jesus Kristus eis el serevelaus a moda definitiva. En Jesus Kristus contonscha la revelaziun divina sia culminaziun.

L'entira larghezia e ladezia dalla revelaziun divina, quei vul dir la rihezia dalla cardientscha dalla Baselgia, ei conservada per nus el plaid da Diu dalla sontga Scartira e dalla sontga tradiziun: La sontga tradiziun e la sontga Scartira fuorman igl unic scazi dil plaid da Diu, surdaus alla Baselgia“ (Constituziun dogmatica sur dalla revelaziun divina *Dei Verbum* 10). Quei muossa a nus il Secund Vaticanum e conferma cheutras quei che la Baselgia ha gia adina dociu. Il candidat pil Batten less retscheiver quella cardientscha, vegnir instruius en quella cardientscha e vegnir battegiaus sin quella cardientscha. El less vegnir introducuis en quella rihezia da cardientscha dalla revelaziun divina e viver dad ella. Quei ei siu giavisch e siu dretg.

Crer munta vinavon, haver fidonza en Diu. Gest quei aspect dalla cardientscha ei impurtonts per nossa veta da mintgadi. Senza fidonza en Diu daventa la veta greva, savens nunsupportabla. Igl agir da Diu ella historia dil salit ed igl operar da Jesus en sia veta terrestre enfirman nus en quella fidonza. Bia plaids ord la sontga Scartira confirman nus en quels graus, aschia era la lecziun hodierna ord il cudisch Deuteronomium: „Ils Egipzians han maltractau e squitschau nus e cargau sin nus greva lavur da tribut. Cheu vein nus griu tier il Segner, il Diu da nos perdavons. Il Segner ha udiu nies clamar e viu nossa miseria, nossa stenta e nossa oppressiun“ (Dt 26,6-7).

Finalmein munta crer, formar sia veta entras mirar sin Diu, pia viver pietusamein. La veta d'in carstgaun battegiau sto adina esser ina perdetga da cardientscha: Ina perdetga da cardientscha enviers tuts che crein buc ni aunc buc en Cristus, ina perdetga da cardientscha dils geniturs avon ils affons, dils educaturs avon il

carstgauns giuvens, ina perdetga da cardientscha dils cristians ch'èin politicamein responsabels avon il pievel. Quella perdetga da cardientscha sa ir aschilunsch che nus fussen prompts d'unfrir la veta per la cardientscha e refusassen buc il marteri. En nossas cuntradas vegn ei mo plidau e scret sur da quei. En bia tiaras dil mund ei quei denton realitad. Il Concil di leutier: „Era sche mo paucs vegnan en quella situaziun, ston tuttina tuts esser prompts da confessar Cristus avon ils carstgauns e da suandar el sin la via dalla crusch ellas persecuziuns che vegnan mai a muncar alla Baselia“ (*Lumen gentium* 42).

La veta perpetua

La cardientscha meina nus alla *veta perpetua*. La finamira dalla cardientscha schai da l'otra vart da quest veta. Quei han era ils plaids da sogn Paul exprimiu oz: „Pertgei scadin che invochescha il num dil Segner vegn

a vegnir salvus“ (Ro 10,13). En quei ch’il Segner salva il carstgaun, preserva el quel per la veta perpetna. Mo pertgei ei quei salvament impurtonts? Cunquei che sogn Paul scriva quei, regorda el nus ch’il carstgaun ha disdiu avon Diu e che la veta perpetna ei periclidada. Jesus tuorna al carstgaun quei che lez veva piars entras malobedientscha enviers Diu.

Igl evangeli stat era en stretg connex cul salvament dil carstgaun. Ei vegn plidau dalla tentaziun da Niessegner (Lc 4,1-13). Jesus resista allas treidublas nauschas insinuaziuns dil giavel. Jesus di sur da lez ch’el seigi da bial’entschatta in assassin (Gn 8,44). El ha viult il carstgaun naven da sia destinaziun eterna en Diu e stuschau el ella perdiziun dil puccau. Il Segner denton ha surventschii ils rampins da Satan. El semuossa cheutras sco nies spindrader. Entras el, entras esser battegius sin el, sa il carstgaun contonscher quella mira, alla qual el ei destinaus dil Scaffider, numnadamein la veta perpetna.

Il Credo dil pievel da Diu

Frars e soras el Segner, la cardientscha dalla Baselgia che jeu hai skizzau cuortamein, ei resumaus el catechissem dalla Baselgia catolica⁴. Ina uvertura leutier less jeu numnar il [Credo dil pievel da Diu](#), il confess da cardientscha che Papa Paul VI. ha promulgau solemnamein suenter il Secund Concil Vatican.

In confess da cardientscha ei ina cuorta resumaziun dalla cardientscha. El regorda nus vid las impurtontas verdads dalla cardientscha e gida nus a tener ellas en memoria. Ella presenta a nus las lingias impurtontas per enconuscher e saver dar vinavon la cardientscha.

Beinenqualga concluda in Concil sias deliberaziuns e conclus cun in tal confess. Nus enconuschein il confess da cardientscha dils Concils da Nicea e

⁴ „Sil datum dils 11 d’october croda era il giubileum da 20 onns dapi la publicaziun dil catechissem dalla Baselgia catolica, in text che miu antecessur, il beau Papa Gion Paul II. ha promulgau cun la mira da presentar a tuts cartents la bellezza dalla cardientscha“ Papa Benedetg XVI., Scriver apostolic *Porta fidei*, 4”.

Constantinopel. El s'exprima en special sur dalla divinitad da Cristus e quella dil Sogn Spert. Cristus ei Dieus, il Sogn Spert ei Dieus. Quellas verdads da cardientscha vegnevan a sias uras tschentadas en damonda e vevan da basegns da vegnir dilucidadas e confirmadas.

Il confess da cardientscha da Nicea-Constantinopel ei vegniu introducius ella celebraziun eucaristica e vegn tochen oz plidaus ni cantaus la dumengia. Ella fuorma ordinaria dalla liturgia romana sa quei confess en certs temps liturgics vegnir remplazzaus entras il confess da cardientscha apostolic, entras il confess dil Batten.

Il Concil da Trient ch'era seradunaus per reformar la Baselia, ha era formulau in confess da cardientscha. Suenter igl Emprem Concil Vatican ei quei confess vegnius amplificaus consideront las dilucidaziuns e definiziuns da quei Concil. Cheutras ei quei confess medemamein in confess da dus Concils.

Il Secund Concil Vatican ha buca relaschau a nus in semegliont confess da cardientscha. 1968, treis onns sunter il Concil, ha denton Papa Paul VI. anflau per bien da presentar in confess extendiu. El ha fatg quei a caschun dallas celebrazions dil marteri dils sogns apostels Pieder e Paul avon 1900 onns. Quei confess dueva formular la cardientscha apostolica cun risguardar ils documents dil Secund Concil Vatican e cun far attents nus sin la tradiziun ductrinala dalla Baselgia, per aschia garantir la continuitad dalla cardientscha dalla Baselgia. Medemamein dueva quei confess esser in muossavia pils cartents en in temps el qual ei dat tontas errurs ed arbitrariadads. Quei Credo il pievel da Diu less jeu metter a cor a tuts sco agid per approfondir e renovar la cardientscha gest era en vesta alla renovaziun pascala dil Batten.

Il Secund Concil Vatican ha en siu davos capetel sur dalla Baselgia drizzau si'egliada a moda speciala sin la mumma da Diu e mussau sia maternitad egl uorden

dalla grazia (*Lumen gentium* 61). Per quei invochein nus
ella sco mumma dils cartents e mumma dalla Baselia.
Sia cardientscha duei esser per nus in exempel, e sia
intercessiun materna urbeschi ora a nus quei agid che
nus basignein sin la via alla veta perpetna. Cun quei
giavisch salidel jeu Vus tuts da cor e dun bugen a Vus
mia benedicziun episcopala.

+ Vitus, uestg da Cuera